

摘藻堂四庫全書薈要

集部

欽定四庫全書薈要

集部

御選明詩卷二十三

詳校官原任主事臣李斯咏

欽定四庫全書薈要卷一萬八千五百二十三

集部

御選明詩卷二十三

五言古詩八

趙寬

七月望夜省中對月分韻

團團月輪高浩浩
天宇闊萬里無片雲
碧色淨如潑開樽
臨前除庭院頗軒豁
況復得佳友發興不可遏
零露生微寒慘澹滿衣葛
留連肴核盡盤礴巾帽脫庾樓足

談賞謝賦深批抹清光世所共勝事吾人奪醉來吸沆
瀣可潤喉吻渴夜久聞秋聲長風起天末

五月十一日晚坐納涼漫書

小樓闌闌中炎日如火熾偶茲西窗雨開襟滌煩思晚
色兼新涼隨風一時至須臾雨脚收眼界益清媚九陌
塵盡消城闕鬱蒼翠玉河蒲葦森瓊島煙霞邃坐久漸
昏黑片月忽照地呼兒具杯酒涓滴輒已醉幽景方自
遠外物皆可棄却笑南華仙猶為漆園吏

烹茶桐江舟中

寒碧淨澈底洒然怡我心乘船臨中流操瓢汲其深野
火藝筠桂芳茗烹瑤琳俄頃發蟹眼拍拍光耀金一酌
洗煩慮再酌開雲襟但覺俛仰間羅列萬象森舒嘯排
寒飈放歌激商音四山正寂寂明月生東岑

自青田至處州一百五十里溪行

萬山蒼翠中一道開連漪稜層削瑤玉委曲盤蛟螭山
勢折復旋水行亦隨之青銅淨無塵可以鑑鬚眉深處

千百尋泓泓徹朝曦百怪悉在眼誰能遁毫釐然犀向
牛渚都笑溫郎痴時復亂石攢瀆薄陣馬馳崩雷殷坤
軸斜漢翻天垂砉然石門開幽洞窅難窺仰視羣峰頭
一峯更瑰奇孱顏立霄漢狀若峩冠縷三峽西瞿唐九
曲東武夷名勝人浪傳疇能過于斯扁舟三日行應接
渾忘疲平生丘壑饒取之良不貲真境未可謝尚有重
來期

訪魏孔淵方伯留飲山亭賦贈

文墨厭羈纏尋幽出江郭春事夫如何新綠暗林薄野
曠天四垂突起訝乍寧團團結丹幢鬱鬱圍翠幙滿耳
翻波濤松檜風萬壑行行躋其巔睥睨但寥廓嵇山一
拳多滄海僅盈勺飛鳥去不還寒潮生復落參差町疇
分寂歷閭閻託東越舊風煙于今頗蕭索主人華陽巾
為我開草閣長髯霜華繁方瞳電光爍遠致遺形骸深
情付杯酌憶公昔當路秋霄厲鵬鶚高才衆所忌戢羽
隨燕雀蹉跎歲云晚勲業夢已昨自從挂冠來園居有

餘樂藏書一萬卷諸子得耕穫虛涼聽雨蓬矍鑠穿雲
屨真酬佚老計猶耿匡時略接談無襍言國事及民瘼
感慨氣填膺煙颺共揮霍嗚呼廊廟心江湖豈忘却乃
知慷慨士舉世堪一喙我懷亦骯髒塵鞅無處著得公
霏屑餘豁如啟扃鑰會心不能留正坐微名縛日脚隱
平蕪暝色帶歸鵲擾擾驅巾車低頭媿猿鶴

邵寶

冬夜觀樹影

月樹影在地橫斜復橫斜誰為水墨畫老筆全無華又如春雷動初驚蟄龍蛇因之得篆法錐鐵行平沙海雲漾雙玕江風落孤楂玄冬萬景閱嘉此獨咨嗟他宵有繁陰莫向時人誇

聽松

聽松復聽松松聲在高閣閣成四十年聽者今如昨風來春濤生風去秋濤落當其無風時蕭然亦微作聽者聽於斯冥心對寥廓

湖口阻風書所見

湖西有青草湖東有白石水與草有情與石乃相激草
邊水微波石也奈水何有石水不濫不願青草多

儲巵

磨臺山中

牆低林木疎馬上見山麓朝陽曠我背蹊徑紆且復徐
驅喜崖豁稍上驚峯獨何當陟其巔一騁遠遊目閬風
眇崑丘萬里疑可縮翻思下土人誰與洗炎燠歲旱不

為霖白雲滿幽谷

靈山

靈山慕名勝曦午停征輶
倒裝換冠幘徑往凌峒蹻手
披茂草開思逐浮雲飄迢迢
詣白塔獨立吹清飈迴旋
休緇廬老屋依山椒野僧三
四輩衲破形容顛共言山
中貧菽水聊今朝問渠何所
戀且得避征徭

白巖扇頭次泉齋韻

黃塵走名都白日觸隆景
雲山忽當眼便自出人境
翛

然蹇驢翁細路轉巖嶺疎林劃空明一笑得人影我家
柴墟旁南望長引領煙蘿繞茅屋江月閒漁艇栖栖恐
無成題詩聊自省

席上賦史巽仲歸雲洞

悠揚滿洞中歸來不知處曉起語農人春田夜多雨却
問洞中雲何時下山去

訪鳳舉進士寺中

聞君僦僧刹屢往屬未閒及茲炎雨霽獨步城東灣路

紆經石棧木杪開柴關老僧訊鄉曲喜溢眉與顏砌苔
淨堪憇庭樹涼可攀藤蘿映瓜圃眷子栖其間此境稍
閒閒已覺起塵寰誰為剝屋角坐納西南山嗟予職吏
局茲游良已慳但恐他時至君去空予還

楊循吉

榮公還金山

十年不出山一游即千里問師何處來固亦偶然耳人
言人閒好自愛巖谷裏紅塵日撲面洗眼無清水孤身

本何將一鉢乃生理來既無所牽去亦誰能止昨聞檀
越船風帆欲南指別我從此逝飄飄白雲履我觀世間
人孰不為身使唯師乃不然來往由自己歸及枇杷熟
憶我青林底

祝萃

紀行

訪舊指攜李權出武原谿亭午歷璵城燠焉如春熙舟
人共裸裎愛此南風吹老夫厄蓬櫬默坐心獨疑雲雨

易翻覆變態不可知戒言避中流沿涯沂清漪屏翳忽
四合飛廉驟如馳鷁首屢低昂怒波揚其威所幸誕登
岸免致檣櫓摧顧彼鄰舟人哀哉沈鵠夷古云行路難
此語良不非相望不百里尚爾逢顛危而況千里程能
保無嶮巇裁詩紀所遭進退宜知幾

石珣

夏夕

暮色蒼然至涼思澹盈衿坐閱古人編稍見古人心遙

岑出天末薄靄凝夏林羣動各有息衡門幽且深

熊耳峯

封龍山勢壯截葉見熊耳高峙層雲間下聽幾千里威
深貔虎避意拔雷電起乃知天降靈自與凡石異浮雲
出晴丹淑氣凝夜紫彷彿懸崖旁呵護有神鬼我思漢
三老幽谷訪遺屐人去事亦非荒池但秋水地靈應未
散烈士還繼軌遥遥白雲中何人隱高几

擬古

秋夜何迢迢蟋蟀鳴陰壁蟾升林薄見露下庭宇闌螢
火寒依人羸駒倦嘶櫪開襟納虛明萬事謝欣戚

飲鮑雲瑞莊居

城柳初盡處薄靄開空明潦降古洲出千里關寸情斷
岸帶芳草遠樹啼殘鶯釣艇日往還或有羊裘生下馬
對尊罍故人相與傾坐久出歌舞柔風濯長纓落霞酣
野色吟蛩戰秋聲長恐西日下衢路立屏營

秋夜

涼夜始多夢升沉頃相尋蟋蟀入床下蕭序已載陰寒
裳出庭戶河漢清且深華月挂林杪高鴻送哀音百歲
豈不多半為風雨侵嗟彼蝸角名煩此孤鶴心流水激
古洲高山出遠岑子期果難逢獨卧枕素琴

送王尚書德輝還餘姚

春花豈勝秋新人不如故紛紛紅紫羣酣豔良未悟千
金買馬骨百網捕黿兔一曲雍門歌夕陽在高樹

春日雜言

長空多浮雲微雨霑四郊美人隔蘭渚雜佩不可要去
年梁間燕今歲將尋巢時物各芬芳吾興亦飄颻

羅玘

送劉使君之任柳州

潞江寒欲冰柳州水如湯萬里赴百粵十年歸番陽江
頭別時兒今作長髯郎有力哮如虎挺身駕長航指言
百粵路遠在西南鄉衡山高峩峩洞庭渺茫茫借問水
窮處一源判瀰湘離合牂與鬱其流遂湯湯泝牂且泝

鬱是為柳之疆二州十縣地榮悴孰主張遐邇皆天氓
周室開明堂頌聲如可作太史紀循良

周詔

飲酒和陶

得時言或違人皆以為是失時言合道求全反致毀毀
譽何足憑窮達亦偶爾前程殊渺茫且來醉羅綺

沈周

過湖偶書

薄暮及東汎眼豁連胸臆淨碧不可唾百里偕秋拭遠
樹水光上出沒似空植疎處方嶽然山黛一睂塞夕陽
掩半面雲浪為風勒便以湖作紙欲畫手莫即見瞥沉
難諦歷多何暇憶舟子無雅情雙櫓闕歸力

門前有垂楊

門前有垂楊枝葉何靡靡飄花欲及地忽復因風起搖
蕩少婦心天涯念遊子愁多肌肉消不敢臨流水

二月八日過靈殿祥公房

理舟指南郊迢迢及側景中途止溪寺陶煙接村暝門
前見新月步步踏松影虛寮寂無風已有孤燭耿衲子
作供養爐香侑碗茗知我解吟事其意似有請宿酒發
孤興捉筆便愀領草草成數行狂書亂斜正復作挂猿
枝墨瀋帶雲冷但記此經過流傳我何省

圖琴川錢氏沁雪石

吳興趙文敏公鷗波亭前有二石一曰沁雪一曰
垂雲流落雲間已不可考沁雪在海虞縣治中錢

允言氏購得之白石翁為作圖系之以詩

亭前峙奇石兀可當一障沁此萬古雪亘地氣魄壯蒸
雲勢欲軒得月神更王妙擬軼仇池潤未下雪浪剗鑿
天借巧胸次見洞宕孤立宜有鄰雅許修竹傍風雨不
敢泐刻名久無恙

石上勒沁雪二字
是松雪翁八分書

實此一夔足礪砢

不多尚貞德允配主白衣可呼丈我見便欲拜良信米
非誑聊與貌高古敢有愚公忘

史鑑

夜宿吳原博太史修竹館時與陳玉汝別

歲暮入城郭攬衣獨裘回晚過修竹園主人故所知故
知義不薄執手言相思復有青雲士遠行從此辭相延
入中林呼童啟雙扉北風何烈烈萬籟鳴參差向夕繼
以燭壺觴相為持初月出雲間殘雪擁寒階獨鶴失其
雌中夜鳴聲悲會面不可常況逢生別離共言盡今夕
雞鳴各東西出處自有時人生安得偕顧慙鵲與鷦不
隨黃鵠飛各各重自愛冀以奉前規

飛來峯

久圖山澤遊苦為風雨欸驚雷破重陰及晨光已顯透
迤入幽深厲揭渡清淺靈山傳飛來合澗互回轉蘿垂
手可捫松高蓋恒偃陽厓丹霞凝陰洞蒼雪滿秀色如
可攬絕巘竟誰棧衆竅因風號羣芳遲春行追念平生
歡厯厯猶在眼匪無新相知已少舊遊伴老僧久見招
相携集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

神樂觀集送沈啟南

暮春和氣暢冠紳集城隅振策闢奇縱流目眇靈區園
丘鬱中天皇矣神明居飛宇入浮雲光景暉朝霞交龍
麗瑤砌摯獸緣金鋪川梁架流虹靈泉激深渠嘉樹夾
道生芳柯綴丹敷奏風何冷然鈞天張清都娛戲易永
日列筵湛清醑宣和賴聲樂間以嘯且歌彼美丘園客
逝將賦歸與羈縈怨遲暮臨風發長吁

杜東原酬意圖

美哉延綠亭水竹含清秀中有鹿冠翁枕書眠白晝雲
卿通家子翹思遠相候執手問平安呼童列觴豆況當
二陰月大火將西流叶林深暑氣消牖啟涼風透鳥嘒
疑宮懸檐流亂山溜杯行不知辭食進時起侑樂事難
具陳奇文每相叩翁言吾老矣此會豈云偶題詩寫新
圖醉墨滿襟袖有暇能再來毋論雨今舊

謨無猷邀飲於南虛室讀壁間馮明府詩有感
獨客困泥雨閉門愁索居天晴氣微和欲出嗟無輿鄰

僧念孤寂招邀過精廬緒風泛林條溜水鳴階渠良友
四五人壺觴聊爾娛陶情非絲竹冥心遊古初為樂苦
不常奈此年歲徂一適非偶然且復少躊躇興懷舊遊
者由來心迹俱風波一分散判然區域殊精神莫與通
夢寐時交胥願言比浮雲隨風往微軀

韜光菴

韜光古精舍遠迹西山岑岡岫屢迴複雲嵐杳深沉流
泉激脩竹綠蘿被芳林密葉翳朝陽芳柯承夕陰杖策

遵微徑逝將支遁尋行行未易即遙聞鐘聲音徒倚絕
塵想冥思諧道心寥芳詠招隱松風和悲吟

落景村

羲和駕驟驥杳杳經天衢向夕迫崦嵫弭節少躊躇餘
光爛未收冉冉下桑榆歸雪棲遠岫暝煙生廢墟野雉
雉中林牛羊下城隅回風忽復來灌木吹笙竽野老耦
耕倦盥濯歸茅蘆曳杖數雞豚引水灌畦蔬達人尚真
意寫圖聊自娛天機宛流動匪為形似拘

支硎山人

幽人戀墳墓構此山澤居層巒代屏障積石當階除飛
泉漱瓊瑤靈籟鳴笙竽清音度回風頽響棲芳株入耳
盡成曲喈喈良不殊臨軒睇冥鴻坐石見游魚飛潛各
有適悠然忘所如緬懷放鶴人不得同交娛商歌滿天
地如與金石俱富貴非吾欲逍遙真有餘

趙同魯

感遇

歲華既云宴，心事成蹉跎。窮達固有命，卷舒如我何。抗
志磻溪釣，紆情莘野禾。鴻飛日冥冥，不復憂虞羅。

黃雲

日夕

寂居山之阿，木葉明返照。陰厓凝晚色，餘霞尚鮮耀。遠
心望煙海，孤興凌仙嶠。歸牧驅牛馬，溪船罷漁釣。閉門
羣動息，默以領衆妙。

遊焦山

昔年過焦門風帆徑飛度老矣遂此遊清絕快平素僧
堂列古鼎欵識成周鑄秀疊水墨屏晴披濃綠樹石壁
舊題名苔蝕若簡蠹仰止三詔洞而以焦君故瘞鶴下
勒銘水落偶一露大江亭呼吸高雲岫吞吐絕頂御泠
風千里可指顧縱目窮扶桑出日蒙海霧俯仰歎今昔
往來走烏兔大哉神禹功明德詎能賦

重修瑞州學石隄工人沒水得古石鯨

類宮臨清江下瞰百餘尺水激岸善崩雷闕走羣石不

知古石鯨何年此窟宅
掀置水之澁其勢欲跳擲
依然鱗甲動水苔滋冷碧
得非昆池來遂與牛女隔
中宵寂無音桐魚庶可擊

薛章憲

趵突泉

咸沸趵突泉發源自王屋
湫流溢為滎迤邐陶丘北
黃山渴馬厓入地乃更伏
潛行五十里突爾出平陸
曾不舍晝夜東匯成川澳
乍似滄浪水浴出三白鵠
更疑清

冷淵白龍服魚服蒲荷相蔽虧鳧藻舞濡淶踟躕不忍
去奈此白日速

戴冠

沃州山次韻

我從天姥遊層雲盪胸臆遙見海上山天際青歷歷俯
視崖下松一一駢拇直飛鳶凌長風欲度憂折翼洞黑
不敢前恐有蛟龍匿霞明石室丹泉掛水簾白茲遊足
奇觀此見太古色初疑補天餘鍊成五色質又疑天柱

折遺此數千尺倚空何崔嵬卓地亦奇特昔賢隱茲山
至今人愛惜遼遼千載下隱者何寂寂山川固依然世
變良可惻

方太古

歸解石山雜題

山高日出遲雲重天寒早源遠斷人煙木落驚啼鳥南
斗雁峯均北極玉欄杪下界隔中天陰陽別昏曉

山中

山中歲云暮抱膝惟長吟北風吹蓬蒿悲響懸高林仰
視浮雲翔白日不為陰昔我三春花今日不可簪昔我
洛浦錦今日不可衾孤鴻逐黃鵠石上鳴瑤琴瑤琴絃
朱絲一操論千金真音不諧俗聊以明吾心

沈本初

嘯臺晚眺

高臺凌日暮幽懷一何閒凭闌縱遐眺負嶠如可攀雙
鳬下澄沼一鳥鳴花間欣欣物意榮寧知光景遷倚劒

白雲中賦詩蒼厓巔飄然拂衣起采菊歌南山

祝允明

述行言情詩

高閎衆祥集泰日百美具豐屋凌飛霄崇樓臨大路高
齋敞華器芳臯羅嘉樹良疇經邇郭麗舫汎妍淑紳杖
旦日臨星曜時夕聚羣公宅威儀百彥盡能賦圖書恣
讐核琴瑟鏗在御崇議每徵今幽求競稽古卮言藹蘭
馥雄辯激水怒觴詠富章什絃吹暢情素西園繼清夜

何愁白日暮

壓榆樊石扉境垣卑四周前楹舒廣場後宇環澄流微
淪帶山趾半覆花竹幽長夏且游浴高蔭終日休豈必
商丘開點爾聊同游

雅尚窮閑覽邇蹤愧卑纏卧遊空能賦道觀多歷年終
南華岳接峨眉太白連九疑元無地太行非有天岱宗
日華浴祝融星漢懸朝餐赤城霞夕拂匡廬煙洪河春
裂壤橫江秋勁弦因過洞庭水自櫂瀟湘船東海本吾

宅太湖襟烏前龍宮多寶藥洞穴鎖禹編靈期似當值
旦暮相付傳

璇穹積重霄迴運迅不停曜靈爍神燭望舒循九行三
垣列君臣萬緯流物形河漢夜半轉四時各財成靈憲
炳乾文至精存吾徵

別唐寅

長河堅冰至北風吹衣涼戶庭不可出送子上河梁握
手三數語禮不及壺觴前轅有征夫同行竟異鄉人生

豈有定日月亦代明毛裘忽中卷先風欲飛翔南北各
轉首登途勿徊徨

龍川山中早行

磻磻左山影橫截右山腰辯色鳥謹翔微光漾晴朝浮
雲若中斷蔚蔚方行遙

朝雲山腰生我在雲中行只恐雲載我飛上白玉京世
塵邈已隔天雞猶未鳴須臾微風發東極金烏升

溧水官舍

皇州本叢麗倖府亦多暇高木停車蓋白石砥根下雞
犬寂不聞明窗晃低亞礪奏不絃琴山橫無筆架流雲
過簷牖斜照盪書畫巖居固同此此寓未稅駕

八詠

錄三首

禁省

彤華耀芝蓋初旭浮絳纈紫殿切五雲螭表雙螭嶠千
門洞陰陰天光互明滅英英鳳翼擁肅肅羽旗列仙韶
忽然奏鳥獸咸應節皂囊上玉陛丹書出金闕

漁釣

幸非城市住不舍煙波宅白鳥麗金沙蒼莓繞黃石涼
陰木澗青平遠水天碧梁寒魚盡落稻晚蟹猶瘠修綸
倚笈簪敗笠蓋襜沽酒自易醉楓根忽終夕

宮觀

青霞抱琳館蘿陰絡深逕龜游煙沼煖鶴立天壇淨微
香拂幽洞欲覓風不定雲房並懸簾晝日鎖虛靜琪殿
臨高臺時聞落瑤磬循除步周匝徧扣無人應

和陶飲酒

吾足如轉蓬遇風無停時
節候迭代序嘗與家室辭
三歲凡五出別離復在茲
行止豈有津誰為我稽疑
不若巢中禽乃免霜霰欺
天運實為爾通塞任所之

徐威

五遊

叱叱甕盎中躍然懷高遷
焚輪駕我騎挈貳挾我羈
約約縱我勒逍遙橫八紘
登陟中天臺徘徊崑崙顛
晃晃

金銀構輝輝珠玉襴祛逐化人舞曲隨王母編渴將絳
雪進飢奉碧霞前吞嚼同沆瀣遠辟螻與臚我髮黑猶
漆龜鶴齊長年

何孟春

東山草堂為劉大司馬作

昔聞謝安石棲跡會稽山一為蒼生起功收談笑間我
公濟世才舒卷有餘閒吹律歲載成遺榮身早還東山
楚猶越千載相孱顏末路士多拘高風誰更攀

舜日麗宸極，大明朝萬方。天下聞風聲，我公真棟梁。公
有補闕線，孤忠託袞裳。公有決勝籌，長才制畿疆。君子
恃無恐，臨流公為航。一朝辭祿去，士類何悵悵。青林舊
盟在白社，始願償其如。本朝心一飯，不易忘宇宙。此東
山乾坤一草堂，請看出處間斯文道彌光。

顧清

臘月廿三日飲德卿宅用涯翁齋居聯句韻

良游集南園，秉燭向深夜。盟尋舊雨餘，坐想重茵藉牆

陰有殘雪鄰酒方索價西瞻太行峯皓白欺二華茲惟
藏春塢豈伊凌風榭洪爐赫彤霞餘香裊檀麝牕明疑
若空簷短不留罅吟苦愁後成綦劬關先下翻思前夕
裏高宴久已罷遠鐘送深更疲僕催早駕顧茲蛭竅鳴
試我蠅頭寫得雋豪屢揮沈思首頻亞忽看山月高顧
影獨驚詫情兼賓主忘氣已芝蘭化諸公信自賢此夕
頗堪訝招要入拘牽窘迫自閒暇詞非石鼎工酒罄金
壘瀉明朝逐餘歡此榻寧許借

程德望祠部登月亭

方塘開我前明月出我東仙人騎鶴來憩我亭之中調
笑弄月影徘徊吟天風夜久月漸高光滿池若空遺我
丹桂枝自携白芙蓉飄然凌風去千里懷德容

飲酒

故人飲我酒坐我清湖潯中燕游後園俛首交綠陰側
磴度別渚回堂面長林西日明遠陂流光蕩我襟喟然
懷往昔茲地幾登臨亭臺無遺構風水有餘音想當古

人時豈不亦似今運去鳴鳥寂時來蛩蠋吟無為後者
惜綠醕方在斟

張節婦詩

節婦京師人錦衣衛僉事讓之女許
字華亭張少保鑒子昱昱卒女誓死

不嫁

妾面君未識妾心君豈知君死妾獨存誰當知妾悲父
母生我時願我有所歸生死向君家終我百歲期我非
慕共姜我非師伯姬自憐有此心不忍分兩歧皇天閔
惇弱回光照孤闈大字表貞節黃金鑄門楣我女諒非

婦拜命慙恩私翻思摧裂初一死真如飴舂生已多枯
寧復知此為賢者有備責妾人無悔辭永抱一寸丹千
秋從是非

鄭岳

九江阻風泊舟有感

白浪起層層峯頭雲正黑迴舟入小港聊茲一憩息路
梗難為期滄波浩無極坐觀北來船帆挂千仞直篙工
意閒暇津津動顏色緬懷造化心施予難為力往船風

宜南來船風宜北南北本異途彼此那俱得物理每循
環明朝未可測隱几澹無營冥心悟義易

過水口

建溪昔隱險橫流多怪石參差列牛馬廉利侔劒戟篙
工慣習水禱賽資神力前後互招呼分寸恐或失激盪
轟雷鳴沫流飛雪白諦觀毛髮豎一命試輕擲逶迤過
水口灘盡溪流碧櫂歌發清響貫酒娛西夕患至慮煩
紆險過事愉懌物理固其然臨流長太息

杭淮

復送世恩得鳥字

朔風吹客衣寒葉辭木杪晨發城東門君馬白驤褭南
北紛多歧聚散感鷗鳥蹤跡雖屢違毋使聲聞杳相望
江一涯素月出皎皎

送劉美之太守赴銅仁

園柳何青青江草萋以碧送子適萬里執手情脈脈嗟
彼雲中雁翔翔依砂磧不為稻粱謀何以有南北努力

任所之悠悠豈終隔

早發巢縣暮宿金城寺

煙靄市上青霜露草根
白日出雞尚鳴墟落溪南北
涉野多寒風枯楊何蕭索
山川莽迢遞歲晏道路迫
王事苦未休慘澹逾郡國
暮逢禪房幽且復舒枕席

送王陽明謫官龍場驛

白日野中微浮靄結朝陰
送子遠行役躑躅傷我心
豈無良朋儔不如子同音
寂寞投窮荒誰能念浮沉
願為

雙玉軫相隨麗瑤琴

許讚

灌口行司

高堂聳陰森樹影互回蔽
鉤廊敞而修翬跂各具勢
亭後產松菊鳳仙亂花綴
蕉肥色欲滴波神散翠袂
迎暉煥光采過雨添清霽
信美亦此居而我懷多戾
種種中夜思如草未經薙
侵晨步後簷兩目驚眊睨
江山足眺遊鄉國渺迢遞
石合岷山蹊草漫巴山際
柴關信可陟

白水還易濟此日副所思鄉心難強制

劉王

夜坐

暝色閤琴書開軒對明月微雨卷薄雲疎星粲成列孤
蹤棲鳥定羣響蟲聲歇緬懷塵外人高枕宵鐘徹

王守仁

憶龍泉山

京師作

我愛龍泉寺寺僧頗疎野盡日坐井欄有時卧松下一

夕別山雲三年走車馬愧殺巖下泉朝夕自清瀉

憶諸弟

久別龍山雲時夢龍山雨覺來枕簟涼諸弟在何許終
年走風塵何似山中住百歲如轉蓬拂衣從此去

登泰山

曉登泰山道行行入煙霏陽光散巖壑秋容淡相輝雲
梯掛青壁仰見蛛絲微長風吹海邊飄飄送天衣峯頂
動笙樂青童兩相依振衣將往從凌雲忽高飛揮手若

相待丹霞閃餘暉凡軀無健羽悵望未能歸

通天巖

青山隨地佳豈必故園好但得此身閒塵寰亦蓬島西
林日初暮明月來何早醉卧石牀涼洞雲秋未掃

龍岡新構

謫居聊假息荒穢亦須治鑿巖薙林條小構自成趣開
牕入遠峰架扉出深樹墟寨俯逶迤竹木互蒙翳畦蔬
稍溉鋤花藥頗雜蒔宴適豈專予來者得全憩輪奐匪

致美毋令易傾敝

營茅乘田隙浹旬稱苟完
初心待風雨落成還美觀
鋤荒既開徑拓樊亦理園
低簷避松偃疎土行竹根
勿剪牆下棘束列因可藩
莫擷林間蘿蒙籠覆雲軒
素昧農圃學因茲得深論
毋為輕鄙事吾道固斯存

西園

方園不盈畝蔬卉頗成列
分溪免甕灌補籬防豕蹄
蕪草稍焚薙清雨夜來歇
濯濯新葉敷熒熒夜花發
放鋤

息重陰舊書漫披閱倦枕竹下石醒望松間月起來步
閒謠晚酌檐間設酣時藉草眠忘與鄰翁別

水濱洞

送遠憩岵谷濯纓俯清流沿溪陟危石曲洞藏深幽花
靜馥常閤溜暗光亦浮平生泉石好所遇成淹留好鳥
忽雙下儵魚亦羣遊坐久塵慮息澹然與道謀

山石

山石猶有理山木猶有枝人生非木石別久寧無思愁

來步前庭仰視行雲馳行雲隨長風飄飄去何之行雲
有時定遊子無還期高梁始歸燕鷓鴣已先悲有生豈
不苦逝者長如斯已矣復何事商山行采芝

諸生

人生多離別佳會難再遇如何百里來三宿便辭去有
琴不肯彈有酒不肯御遠陟見深情寧予有弗顧洞雲
還自棲溪月誰同步不念南寺時寒江雪將暮不記西
園日桃花夾川路相去倏幾月秋風落高樹富貴猶塵

沙浮名亦飛絮嗟我二三子吾道有真趣胡不攜書來
茅堂好同住

寄友用韻

懷人坐深夜惟燈暖幽光耿耿積煩緒忽忽如有忘玄
景逝不處朱炎化微涼相彼谷中葛重陰隕衰黃感此
客遊久經年未還鄉伊人不在目絲竹徒滿堂雲深雁
書杳夢短關塞長情好矢無斃願言覲終償惠我金石
編徽音激宮商馳輝不可即式爾增予傷馨香襲肝膂

聊用中心藏

別湛甘泉

行子朝欲發驅車不得留驅車下長坂顧見城東樓遠
別情已慘況此艱難秋分手訣河梁涕下不可收車行
望漸杳飛埃越層丘遲回歧路側孰知我心憂

周倫

雨霽登馬鞍山

春暮日始霽尋幽憩上方洞壑石衣冷幡幢松雨香悠

然倚雲閣極目塵沙場

張琦

遊長山

偶偕羣從遊騎馬秋山冷笑語應谷聲揚鞭亂江影入
山尚未深而有山棲境紅子落長藤蒼苔覆脊并短棘
刺我衣朔風吹我領飢腹覓蕨根健步出松頂樵人四
五家炊煙忽生暝問樵何處山云是丹霞嶺龜勉越崇
岡豁然見高景飛鳥盪胸至浮雲暗生脰陟高原自平

可以發深省

謝廷柱

茶園市伍家候大巡

微風散輕陰
日色在雲裏
出郭天氣佳
游衍心自喜
肩輿歷青原
瀰瀰見溪水
農家住林藪
前山若屏几
因話田與桑
欣然憶鄉里

九月六日早發新化

出郭問前路
度溪望千峯
曉雨送薄寒
碧嶂迴秋容
人

言秋思悲我愛山色濃歸興儻如此宦情渾已慵故園
黃菊花正及茱萸鍾佳節不負人江海媿浮蹤

過彭澤縣

挂帆過匡廬樣舟向江縣彭澤舊知名淵明今不見巖
松露沾蓋堤柳風拂面雖非當時物過客生愛戀公如
素玉姿不以緇涅變又如瑤臺鶴凡鳥亦知羨我欲賦
弔詞清詩公所擅我欲酬一觴薄酒不堪薦漲澤曉乘
舟秋濤夜馳傳區區葵藿心瑣瑣片曝善因公懷昨非

歸里今得便

周用

清都

惟昔遊清都眷茲固難忘此日復何日真宰垂謙光合
沓來天人羽儀紛成行被髮乘麒麟赤脚踏鳳凰層霄
何嵬嵬瓊宮互相望六丁啟九闕稽首朝紫皇紫皇顧
之笑置我玉座旁當筵舉北斗為我酌酒漿一酌好顏
色再酌生樂康羲和鞭白日回車息扶桑夜半聞天雞

九州但茫茫

思古

古人不可見要見古人心義皇日已遠河嶽徒高深焉
知千載後無人復思今為君歌所思清風激商音

恥菴

子車古有訓人不可無恥悠悠下千載聞者乃興起清
風濯厚顏伊人欲何俟西山伯夷薇東海魯連水願言
謝賢達毋獨為君子

魯鐸

送友人歸武功

庭臯鳴落木游人感秋風
援琴起中夜鮮復襟期同
寒蛩響簷側高雁翔雲中
雞鳴戒行李微日東窗紅
游從集盤榼酒盡情未終
行人難久留矯首成西東
願言尺素書歲歲常相通

雜感

東村有松檜西村滿楊柳
我家住村東來往村西久
浮

陽起郊原游行及親友取蔭東西村常倒尊中酒風霜
條摧厲此意遂相負吾廬翳松檜搖落殊未有

苔苔孤生桐託根雲夢臺青皮閱歲年細雨生莓苔衆
羽欣所止威鳳有時來歲晚歇芳意搖落依寒梅

端居有所思所思在長安冉冉歲云暮夢想接客顏緘
書不我遺悵此別恨端徙倚向幽獨喟然傷心肝

懷人不能寐被衣彈鳴琴鳴琴若作意中夜發孤音美
人在何許遙憶湘水陰征鴻去不返雙魚逝何深引領

重躑躅幽恨獨難任

徐問

和孫太守朝望登毗盧閣

與客登層樓鉤簾瞰幽壑秋色動遙林千厓自空廓俯
視清川流或見沙鳥落涼飈拂襟袂閒雲漾飛閣書臺
藤蘚荒伊人久云邈餘香有叢桂三鶡風前萼

歲暮

海濱歲云暮草木尚莽蒼玄枵隱化機羣蟄寂餘響誰

云果不食有復繼茲往充然天地心生息在反掌況乃
青陽交和風遍穹壤陽德嘉再亨吾亦觀吾養重闕靜
喧囂性定道心長百年日斯征撫事集遐想惟當務崇
德不媿茲俯仰

陸深

聽雨

白髮日夜長青草綠堦生江村荷時雨潮田愜耦耕稍
稍辨遠樹依依見孤城魚鳥亦何意上下如有情撫已

得良晤與物本同生
遭逢百年間重陰幾開晴

清河曉發

清霜肅晴野秣馬乘暗發
長途迎淒風疎林薄殘月
三五東方星橫斜北斗沒
似聞度前陂苦寒傷馬骨

儼山精舍晚意

林深暮煙紫海近秋月白
稍稍神慮淡悠悠寺喧隔
乾坤等逆旅誰非遠行客
遣此百憂端棲我一畝宅
楚狂雖忘世湘纍竟何益
寄情混漁樵託契友金石

寓彰德倉司小憩頗有花竹之觀

愧乏瀟灑趣享此山林居時花當春發喬木向日舒好
風泛崇光有鳥鳴前除坐久獨顧影悠然思遂初去住
各有適得喪兩俱無

龍泉

瀑布下匡廬倚天垂玉柱瀟瀟六月寒坐對白龍舞幽
人送目餘新添夜來雨

張邦奇

感遇

我昔見媼人婉孌容色好
貼我瓊玉鉤願言佩終老
我來既已晚美人逝不返
薄帷明月夜使我心悽惋
芳蘭何葳蕤采之將遺誰
感彼媼人贈銜思空淚垂

迎春

閉門終日坐不知天地春
鴻鈞一以動百物相鮮新
憶昨凋落時梅李各有仁
如今發生氣亦復資網緼
達人均四海愚者分比鄰
嗟予二三友歡會當及辰
我有一

尊酒可以陶吾真

送張君用之鶴慶

燕臺一尊酒送爾滇南行
風塵萬餘里極目難為情
故人忽已散落日玄蟬鳴
曾無別離色可以觀平生

送王宜學編修謫官三河驛

若華照四海靄靄凝浮陰
揮之不可得憂心日欽欽
嶺南多嘉樹隆冬見青林
去去遠垢氛聊以澄煩襟
綠衣無怨言白華多苦心
願子崇明德永言終令音

祝融峯

危峯踰萬仞衆峯不敢並到此得大觀超然稱心境捫
星或低頭望日不引領分明見負儀恍忽凌倒景時月
當坤陰霜林肅而靜我欲回陽春叩此祝融頂

徐縉

送徐昌穀使湖南

鴻雁惜離羣噉噉鳴不已如何平生親奄忽去千里懷
哉可奈何王事有端委城南走相送意逐東流水駕言

度前岡迤邐歷河涘道路阻且長嚴程自茲始贈子以
瓊瑤酬我一端綺

昔與子北征嚴霜拂貂裘今子遽行邁春水浮蘭舟永
懷會晤好重此離別愁出門望千里楊柳條已抽想見
歲月積回首瀟湘秋遙窺九疑山近賦黃鶴樓嗟哉滯
一方安能從子游

感遇

朝旦別燕京景落憩吳船揚舠發潞渚伐鼓信洄沿芳

蘭已衰歇歸鳥紛飛旋颭颭風揚沙皚皚冰塞川黃雲
結四野白霧縈三邊顧瞻望城闕參差御飛軒撫化心
愴惻覽物淚潺湲行行指舊山稅駕從所便

黃鞏

山中吟

春山澹無姿春雲濕將雨隔林有人家知是雲深處雲
深山徑微欲往疑無路不如山中人只在山中住

孟洋

別家

僕夫早嚴駕行行之楚鄉依依戀故里尊俎臨道旁親
友偕集送兒女泣成行隣國非遐征歲月未可量白露
塗郊原秋草日焮黃沙禽竝棲宿鴻雁東西翔且為斯
須留日晚途路長不云行役苦徒令居者傷

殷雲霄

聞太初出遊

江風散微雨重峯生遙碧林端浮新青梅遲見殘白地

僻爭訟簡吏散庭院寂煙水澹孤城齋閣坐成夕忽念
同懷人清光隔咫尺溪舟時載酒野步或携策靜躁心
詎異寤歌聊自釋

感遇

孤鳥失其林日暮鳴且飛風枝棲未定搖搖將安歸中
洲有芳草慘澹少光輝舟楫蕩流波根株苦無依悲此
遠征人三代故鄉遠萬里長塗間安知身是非東海有
釣綸西山可采薇悠悠迷方子誰能識其幾

宿江陰得太初書

侵晨發毘陵薄暮及江陰積雪明高原歸鳥喧前林孤
舟風雨夕大江雲霧深遙遙越鄉感脈脈遊子心美人
隔江浦晤語安可尋情至物有合離析領瑤音愛賞欣
自古慕羣悲獨吟寄言狂歌客一尊待吾斟

雜詩

春日倉庚鳴百芳麗以繁桃李成蹊徑蝴蝶何翩翩一
朝鳴鴝鳩零露下庭蘭搖落非所悲所懷無由宣歲華

遂云晏歎息將何言

終日抱膝坐門前無來客所懷不可忘
脈脈想疇昔登高而遠望雲霧塞八極
離禽飛且鳴孤蘭慘無色晤言思親友
日暮空歎息

寄繼之戶部

玄鶴摩天飛求友得雲鷺一為萬里別
悲歎隔雲谿豈無百鳥輩異趣多町畦
何時三珠樹與爾同幽棲

采蘭金田山懿此幽獨春區區徒自愛
持以贈遠人比

鄰豈不好寄託各有因願言保芳潔即此常相親

林文纘

再入計

冒寒發江郭隨衆述所職驅車策駕馬夙夜不遑息行
山歷峻阪遡川履深澤昔來楓葉青今往霜林赤郡縣
本舊游轉盼非疇昔新知多遷除故吏半更易惆悵時
物移銅符猶未釋服役職所任詎歎如蓬跡耿耿懷抱微
誠天顏期再覲

巖嵩

山塘

山塘深且廣，邈迤抱山麓。
隔浦見人家，依依桑柘綠。
日落煙水寒，遶塘飛屬玉。

仰山

石磴盤秋蘿，危亭出峯樹。
行人上山道，望望雲飛處。
洞口曉鐘聲，林僧獨歸去。

贈友

北風吹層波高帆疾於馬矯首望雲山日夕到鄉舍親
友慰遠歸春杯正堪把故園多所歡薄宦何為者

阻雨不得登蟠龍

溪上風雨來颼颼篁竹亂油雲翳層峯對面隔霄漢鳥
道紆百盤龍門在天半佳期恨緬邈寒望增淒斷下馬
憩林居一顧屢長歎自無飛仙術安得凌絕觀

常甫憲副欽之翰檢與予先後登嶽欽之獨值

雨同賦

祠謁朝景暉峯登雲物變今朝山中客零雨罷登踐林
深厓路窄幽賞不可遍磴滑危難步谷暗近莫辨茲山
號靈幻頃刻殊隱見叨余上晴巒萬狀悉輸獻媿乏摘
毫賦琢句被厓蘚君侯擅風騷胸中富溪巘佳辭出天
巧不復勞洗鍊巖巒閎輝彩草樹迷蔥蒨豈被山靈妬
或遭造物譴並覲欣茲奇獨往惜已殿期君嗣芒屐言
保筋力健

陳彝

憩桑洲驛

六月如坐甌崎嶇歷寒景襜襪既不堪況乃越崇嶺鳥
聲當晝寂松杉疑晝靜桑洲知駐足遙望神已騁行行
驛解渴趨丹井解衣卧北軒遙山度雲影



御選明詩卷二十三

總校官庶吉士
臣侍朝
校對官檢討
臣蕭九成
謄錄舉人
臣傅瓌芳

總校官庶吉士 臣侍朝

校對官檢討 臣蕭九成

謄錄舉人 臣傅瓌芳

欽定四庫全書薈要

集部

御選明詩卷二十四

欽定四庫全書薈要卷一萬八千五百二十四

集部

御選明詩卷二十四

五言古詩九

李夢陽

發京師

萬蘿附松柏枝葉固相因
行子戀儔匹況遇同鄉親
北風起河梁日暮多飛塵
攜手同車歸駕言西適秦
道遠長渴飢客子懷苦辛
仰瞻天漢流夜永不得晨
驂馬媚

其曹鳴雁各求羣明星出東方照見車下人夙興即往
道登彼高路津還顧望京邑愴焉何所陳

田園雜詩

壯時掉塵鞅老乃即農務值茲田事終怛然感霜露原
萋日以斂林華不守故嚴霜淨游氣翔鵲在天路鷦雀
躍蓬蒿啄食不滿嗟而余竟何言飯牛髮今素

雨後往視田園同田熊二子

鳥性悅儔匹人情豈無慕亟見不云數獨行必相呼昨

有城上眺今復郭南步膏雨回原綠楓林宿殘霧久蕪
慨我廬旱水兩妨誤夏禾旣岑漠秋秭庶能穫釀具粗
已足念子有長路

贈青石子

高鳥有違羣離獸多悲音懿彼婉孌子悵然分此襟朝
發南河隅夕暮乃北岑玄雲旣無極黃波浩且深君其
四海翔無言還舊林

季秋凋羣木寒潦濫中軌笳鼓濟方舟軒車匝河涘攀

德惜遙邁悵分睇馳畧采蘭徒情結把菊為誰美願子
厚衣襦霜露自茲始

贈孫生

古人種桃李不為蹇其花君子振英芬豈在文與華炎
陽赫晴彩百卉流丹霞賁彼東園實纍纍一何嘉采者
自成蹊舉世徒咨嗟

甲申中秋寄陽明子

風林秋色靜獨坐上清月眷茲千里共眇焉望吳越窈

宛陽明洞律元芙蓉闕可望不可即江濤滾山雪

贈鄭生

杪秋木葉脫霜露告成歲驅車遡寒郊觸物念征邁戒
舟有程日維駒阻心愛所幸旦暮留前途或風瀨

贈劉氏

矯矯雲中鵠忽忽晨南翔連翩客遊子駕言逝何方霜
露日夜零東路悠且長意欲從子逝我馬玄以黃徒思
諒無益欲置遽難忘愛子千金軀雙親在高堂

贈劉主事麟

駕舟越洪川，飄風揚其波。白日不可駐，浮雲一何多。
寒芳涉北沚，采蟲陟南阿。悵我平生友，傷此欲如何。
濛濛孤舟夕，橫笛坐煙浦。秋綠被汀沙，落雁不可數。
烈調干行雲，激商復流羽。曲竟和者誰，佳人淚如雨。

又贈王舍人

送美城東陌，還車望上陽。觀闕百餘尺，蓉城鬱相望。
同在天一隅，子今旋舊疆。經子故所居，我馬立徬徨。

徬徨亦何為，悵望遠行客。
枯桑號天風，時節倏復易。
簪紱非我榮，棄置安所惜。
願為東南風，遂附高翔翮。
勁翮無羣棲，靈根豈叢蔭。
人生非苦匏，安得常相見。
動息各有因，況乃異鄉縣。
徘徊岐路側，仰視雲中雁。
雁征會來歸，君行何日返。
驚風飄馳光，歲月忽已晚。
登山采白苓，遺我心繾綣。
上言制頽齡，下言助餐飯。

衛上別王子

晨風應候至，雞鳴各嚴車。
我今游宋中，子當旋舊閭。
僕

夫理前綏轅馬悲鳴趨一別阻秦周相望萬里餘首春
霜露重厚汝征衣襦昔為同袍士今在天一隅故者日
以遠傳能察區區

贈徐禎卿

獨處忽不懌攬衣循東廂樹木何修修春風起飄揚我
友駕在門告言適江湘倉皇挈玉壺追送臨河陽顧瞻
兩飛鳬竝戲水中央翩翩厲羽翮鳴聲一何長奈何游
客子一別永相望時澤亮有周天命固其常薄終義所

劣別離庸詎傷懿彼回路贈慷慨申此章

送友人入關

南山鬱幽幽豐水白浩浩烏啼漢城樹塵起咸陽道
馬東方來長鳴翻玉蹄春風吹綠草明月滿關西

送友人之京

與君何處別汴州金梁橋下有古時水遙接廣陵潮
君搖錦帆去萬里上雲霄我掇金光草方期白鶴招

自南康往廣信完卷述懷

朝離傍羅浦東至龍潭宿戢柵候明發獨寤守空曲宵
晝有常理欲往不獲速多慮良攪眠強置復攢觸起立
萬動寂湍響應鳴谷驚風臨岸激高月散春木絮雲吐
岑岫玉繩低以屬慨哉復奚道徘徊至天旭

予懷百門山水尚矣頗有移家之志交春氣熙
忻焉獨往述情遣抱示同好數子

閱圖訪名奇久欽蘇門山危峯羅縣牖積石磧鳴泉清
吟激衛女嘉遯招古賢出遊結夢想神往理誰詮連巖

既鬱紆迴渚復綿芊猿吟曙霏豁雁泊暝陰還杖策躡
手葺解裾濯漉浹仰視遊雲翮俯察戲藻鮮覽物慨幽
存撫化懷冥筌況逢春華交更此眺孤煙畢婚非達生
一嘯復何言

自大過渡河趨陂沙岡

凌春遠行邁游目恣沿越漸辨林中曙遽失霞上月觸
物誰為情悲歎曷可歇載登隋疆場汎眺宋城闕陽坡
散初柳陰曲峙寒雪只此判氣候豈必殊燕粵潛潛濁

河駛𩇑𩇑晨風發揚帆截驚瀨倚櫂望窮髮鳬雁眇難
即汀蘭翠堪纈美人旣莫期天路復幽絕陂岡鬱參錯
岸沙皓明滅日暮孤雲興何以慰忡悒

覽遊百泉乃遂登麓眺望

束髮懷幽奇覽籍冀有遇來登百門泉果協佳勝趣
忘負波涌藹藹浮陽聚止坎渟泓洌激石迅湍注昔聞
滄浪濯今解川上喻豈惟傷衛歌兼以發蒙慮況值春
序中羣物已改故菰蒲冒清深鱗介各有慕行羨浴渚

鳬靜對棲雲鷺巖扉空潭影林藹變朝暮極目北上帆
朝宗感游寓

德安趨潯陽

始征晨風息雲流日色展登陸艱且澀厲澗一何緬維
時仲秋交颭颭林颭卷綠竹垂我車丹花映行憶冒巒
維有松繡石盡成蘚攀蹇雖多悅亘頓乃勞倦日中迫
廬岳蹊徑愈回塞雲湧連遙嶠雨暗失近巘奔崩萬壑
會嶮絕一徑轉遽訝川梁沒幸遇石瀨淺道以習坎利

用待既濟顯介石諒益固巨川豈遂眩誰哉能豫謀隨
寓斯可遣

宿圓通寺

曉發蒲亭邑暮投石耳峯僕夫困霑濡山雨猶響松茲
壑況采阻顧望惟溟濛幽巖托層房豁然臨猴江竹修
苞北基巖峭垂南窗俯觀梟戶蘿仰聆走簷淙挹此輶
足遣逖想情難降陶公有遺墳黃子留孤踪通止良固
殊羈縛誰為棕坐聞吟猿暝祇令歸思忡

白鹿洞徧覽名跡

情高忽凌厲步健輕巉緬葛弱亦須捫厓滑每獨踐涉
清愛重屢探阻遺驚眩始茲陟五峯遂憇松下巘巖桂
紛始華石耳翠可卷追想白鹿跡伊人竟何遣觸端緒
自縈薜荔沉在眼慨歎意莫置顧望日已晚夕湖浴岑
峭流光滅蘭坂命酒寫幽獨鳴琴且游衍

赴懷玉山作

始臨清溪寺不謂茲路艱崎嶇踰南嶺轉見山鬱盤重

陰起北谷凍雨響前巒志定邁孰禦勇往竟孤攀挽葛
接懸狹架木凌飛湍律律巖壑變颯颯嵐風寒隔港望
絕岫亭亭已雲端

薛家樓宴

閒遊北城隅俯視清江郭洪川帶名都形勢自相錯樓
觀藹鬱鬱街巷紛以漠北城良已高況陟城上閣輕裳
拂倒景飛檻聆天樂夕山一何蒼夏潦彌井絡衝風激
回流玄霜駭難泊暗觀逝者危遂悟居者樂慷慨亮易

感捫心果誰惡夷險非我為劍彈且盡酌

上巳海印寺

勞生苦役役況乃值溫陽林園有嘉榮蹊渚生柔芳秉
簡迹已陳袂獨難忘駕言適蓮宇迂紆陟虹梁我宮
延暮色陂樹藹青蒼詎知幽勝區占茲佳麗鄉居然心
境寂彌增塵路傷

秋日重過上方寺

居間懷行游觸景慨時速昨來春華敷秋草條已綠弱

卷二十四
頻布霜連叢蘭委寒陸
纍果媚西陽漂穉滿空
曲物遇信綿曠情移乃
躑躅夷猶步前庭迤邐
陟層麓夕風一何厲行
雲結相逐鐸音抗高聽
塔影駭流矚聿非封侯
骨虛疑燕頤肉飛纓靡
不榮芒屨諒應足寄謝
世上人吾久脫羈束

雜詩

西國有佳人獨立青雲
端容豔若桃李左右佩
芳蘭含思理玉琴泠泠
一何閑更節有餘悲曲
終再三歎借問

歎者誰中意難自宣
沉吟攬衣帶仰視鳴鶴
翻思阻望不申何況
隔丘山

朔日

朔日悲風起空除
落葉平猶聞砧杵急
已復剪刀鳴一夜傳
霜箭黃雲滿塞城

槿園

槿園秋氣夕唧唧
寒螢聚風回啼欲斷
月落歸何處爰悲在
堂吟復詠山樞句感
爾中夜興微霜下庭
樹

正德四年七夕上方寺作

逸人厭覓俗達士樂閒勝乃茲城中林而非車馬徑積
雨豁新霽雲石掩秋映微陽下孤塔潦水夾明鏡已疑
塵寰隔況覩蓮宇淨豈惟慕真覺亦以叩詮證玄蟬共
西夕浮雲本無定

山中

山中雨乍歇一夜瑤草長風吹翠巖竹下應石瀨響時
來展書坐悠悠絕塵想

山夜

孤月上東岫白鶴激秋唳涼風振溪壑林影颼搖曳山
居本深靜夜氣復澄霽冥心向千古眇焉托真契

何景明

平越

清晨發平越霧暗山益密僕夫各相戒路遠恐迷失薄
午游氣清參差衆峯出雞鳴溪谷中始見厓上日雲葉
分杳冥高原被華實秋風起叢林興感乃非一悠悠遠

行邁歷險難具述

桃川宮

谿谷多青氛朝暮不可知雞鳴洞中樹輕暎散華池白石流丹液靈葩耀朱蕤誰能學丹術遂使塵網離

溪中何所有磊磊多白石紫參生其陽青松植其北遠林商氣清絕巘夕光白何當發雲奏招我吹簫客

自武陵至沅陵道中雜詩

叢薄被煙阜徑路紆且微秋風振喬柯綠葉漸以稀日

入羣動息林深衆響歸君看棲枝鳥大小必相依

普定

鼓絕拚山城空堂思起忽孤燈明夕惟悄悄涼風發落
葉何飄蕭飛螢互明沒客牕臨古寺坐待微鐘歇

姜子嶺至三岔

出嶺上雲霓入谿下煙嵐高高不可極杳杳詎能探朱
崖秀夏木石壁映寒潭千秋覽葱蒨百丈窺澄涵崩奔
谷響赴隱曜川光含登陟力不辭險阻情已諳潛淵羨

垂綸越巘思停驂振策岷峨西揚帆江漢南臨深非忘
懼履坦但懷慙

泊雲陽江頭玩月

扁舟泊沙岸皓月出翠嶺開窗鑒清輝照我孤燭冷高
林散疎光遠渚接餘景縱橫銀漢迴三五玉繩耿弦望
幾更易客行尚殊境佳期邈山嶽端坐令人省

平埧城南村

朝出城南村策馬入荆杞村中八九家煙火自成里兒

童候晨光稍稍荆扉啟四鄰務收穫時復披草語昵昵
何所云但言好禾黍

秋陰結林霏細雨洒茅室牧放止近郊牛羊不相失廣
園散花林平疇藹風日長幼不出門咸知戀儔匹喧喧
車馬中徒為慕高秩懸輿當何時可使志願畢

沉沉古陂水日暮寒更綠隔陂見居人蘿蔓纏草屋摘
禾留客飯採薪伐秋水童稚持竹竿雨中放雞鶩區區
化外國猶得覩淳樸

還至別業

雞鳴高樹杪，狗吠墟里間。
家人望車徒，遠客造門端。
入門問所親，上堂叙悲歡。
行人暮飢渴，秉燭具盤餐。
明月照西戶，三星爛中天。
出門踐野草，白露條已漙。
十年苦行役，茲夕方來旋。
寧知非夢寐，忽忽心未安。

詰晨親友至，筐榼攜所需。
各言平生歡，念子久離居。
綢繆語未畢，展席臨前除。
園榮亦已抽，況有盤中魚。
人情倦懷土，富貴豈常於。
無為泥形迹，所願恒相俱。

弭駕及春暮比屋事耘耕時物展遐矚契我遺俗情故
林茂以密敝廬亦將成芳蘭冒紫葢園柳尚垂榮澤葵
蔓廢井瓜田依故城策杖衡門下仰偃遂平生所願在
怡親餘者奚足營世情惡衰歇天道遞虧盈駟馬豈不
貴翻覆坐相傾

遊魯城山南舍

溪行日亭午暑氣稍見侵脫巾坐芳草前有嘉樹林白
雲澹清景綠葉垂繁陰喜無鳴蟬聒幸有好鳥吟久厭

區中緣撫茲意彌深浩歌答良友聊用開吾襟

七夕

逝節忽不處佳夕復我臨神飈汎光蕙渥露霑華林緬
彼牛女會茲端竟難謀形影潛相望胡由接徽音飄颻
翠龍駕髣髴青瑤簪長河坐移轉素波斂西沉靈彩歛
以晦游雲起層陰同歡戀膠漆異處悲辰參翹思慕遠
匹感此涕流衿

十三夜對月

閒居愛明月良節復與俱金魄麗秋闌皓彩揚雲衢澄
空斂霜煙清飈蕩中區徘徊廣庭內改席臨方除顧景
怵衷慮興心念居諸天道遞消長戒之在須臾懷謙可
久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離
離絳霄側冉冉素雲揚踰時灝氣徹縣耀天中央仰視
渺難即忽覺在我旁清池含微波左右浥流光月行固

當望人會何能常與子各鄉域邂逅臨此堂良時不屢
值明月安可忘醉歌答永夕和我窈窕章

十六夜月

日夕城煙斂列宿出復多開軒望明月展席流素波負
輝雖少虧猶能遍天涯單居不為樂念遠徒咨嗟美人
越崇京高樓結綺霞浮雲暮長征何由覩光華迅飈萬
里至霜霧日以加坐憂桂枝歇委落同泥沙清輝苟相
照豈慮天路遐

十七夜月

更深月復明揚秀青雲端浮颺條以寂長川靜波瀾徘徊廣除下白露棲崇蘭仰見城西樓迴光照文軒樓中織綺女延頸獨哀歎哀歎未終已素河橫西山逝魄不長望玉貌寧久妍君母吝光惠使我芳歲闌

擣衣

涼颺吹閨闥夕露淒錦衾言念無衣客歲暮方寒侵皓腕約長袖雅步飾鳴金寒機裂霜素繁杵叩清砧哀音

緣雲發斷響隨風沉顧影惜流月仰盼悲橫參路長魂
屢徂夜久力不任君子萬里身賤妾萬里心燈前擇妙
匹運思一何深裁以金剪刀縫以素絲鍼願為合歡帶
得傍君衣襟

擬古詩

名都有高樓上入青雲端脩城延曲隅阿閣交重闌佳
人理清曲當戶橫朱絃揚音彩霞裏令顏誰不觀賓客
會四座絲竹哀且繁日中車馬至薄暮皆來還聽曲各

言好知音良獨難

淒淒仲秋日百卉腓以殘涼風入階樹零露摧庭蘭明
月皎東壁昆蟲鳴草間孤鴻暮安適哀音揚雲端眷言
平生友振翮起孤騫遺我若逝波望子如高山托忱在
終始蓄久諒逾宣寸心不可移磐石誰謂堅

繁霜降秋夜膏火寒無光淒風舉帷幄素月流中房客
行在殊境獨處誰與將仰視天上星羅列皆成行牛女
獨何辜玆玆守河梁嗟無臨風翼欲去不得翔引領長

太息涕泗徒霑裳

圓如天上月光輝尚當缺與君非一身安能不乖別關
山日悠遠舉步難可越君如雙車輪妾心如車轍相隨
萬里去繞繞何時絕

詠懷

北陸無淹晷歲邁陰已長攝衣起中夜凜凜悲嚴霜明
月麗高隅繁霜縱以橫徘徊仰天漢惋彼參與商形影
永乖隔萬里徒相望

列炎灼崑岡乃辨金石堅金石有恒性銷鑠詎能遷薪
樗莫傷桂刈蕭毋及蘭薰猶不同器清濁本殊源君覩
高翔翼卑棲非所安

英英園中槿朱榮媚朝陽朝陽倏西隕朗月借其光馳
輝難久耀華隕不再揚番番白馬郎皎皎青樓娼容好
豈足恃相要在衷腸

贈王文熙

行子夜中起月沒星尚爛天明出城去暮薄長河岸草

際人獨歸煙中鳥初散解纜忽以遙川光夕淩亂

出城贈韓子

晨車去遙遙將子城之隅城隅何所有有荷復有蒲念
當與子別思心立踟躕他人豈無友非子誰為娛折荷
勿涉水涉水濡子車安得瓊瑤華採掇為子需

古怨詩

隕葉辭舊枝飄塵就岐路遲徊決絕意言念平生故泥
泥行間泥零零蔓草露豈不畏沾污為子無晨暮

青石崖棧

秦中

側行青石棧誰能久延竚斷板連曳雲噴泉灑飛雨迅
流西回激峻坂東折屢隕岸互傾欹危梁裊撐拄飲猿
駭游鱗立馬接翔羽慎爾千金軀永念垂堂語

徐禎卿

對雪贈客

雜絮下瑯霏飛滿洛陽城仙人深雪裏獨戴鹿皮行高
卧思安道攜琴就阮生竹林陪素蟻兔苑玩流英誰言

剡水棹今日在瑤京

登半塘寺閣

夙有山水慕苦為形役拘澹茲夏日永聊得狎浮圖攀
雲凌廣閣靄靄見吳都諸川散林上平野鬱芬敷法花
垂縹緲晴采動虛無煙火下方襟昏明時態殊境超自
生樂疲心忽重蘇因傷人世子擾擾即長途

送友

瓜生葛薪下緣蔓義相因人生結文故婉孌自懷親交

義諒不遠戚若同株根勿采棘下瓜棘傷多苦辛不惜
傷者苦但恐株芟分念當與子別惻惻傷我神

留別邊子

我車駕言邁將子城之隅豈無他人親婣戀心自知握
手一為歎忽忽從此辭驅車何迢迢迢迢復遲遲匪我
車輪遲行子有所思登高望河水河水何瀾瀾褰裳欲
涉之俛首以踟躕孤楊生河干嫋嫋何差差民生失儔
匹惻爾令心悲

留別都城諸同志

對酒忽不樂，悵然懷別離。
別離結中勞，眷彼長路歧。
苒苒郊河樹，曖曖關門祠。
佇望瀟湘水，先與秋風期。
鴻雁雲中來，噉噉使人悲。
懷哉爾方集，恨矣予當辭。

送邊子出刺衛輝

平生歡愛日，履坦昧前艱。
及爾嚴霜集，方知末路難。
疇昔同棲翮，毛羽各摧殘。
顧影惟爾我，慼慼傷心肝。
心肝義所均，離索一何深。
雖歷同朝寺，雲路邈飛沉。
君

處承明陽我居湖水陰淹閣嬰多痾日夕遲爾音
爾音良不違胡為繫我思何況當乖絕飄飄各異枝款
曲杯酒言果諧符守期努力茂時猷聊以慰我私
我私何悠悠薄送遵垌丘朔野曠無人樹木鳴颼颼登
高望衛邑思見漕衛流前景奄忽匿浮雲蔽行輶
行輶道已綿下車歲聿遷藹藹朝歌邑閭里翳人煙慷
慨猗昔風緩疾在更絃寄謝當途子成菴庶來還

送唐季和謫穀城

襄陽千里道念爾一杯辭上馬山公醉曹騰倒接羅回
風漂朔野飛雪繞征旂及此下車日黃河冰泮時江喧
神女館花發峴山祠莫謂長沙謫風流良在茲

懷往

穴蟲測序改客鳥知時晏嚴風振中野凝霜薄飛觀褰
裳啟東戶河星出有爛耿耿不遑寐沉思遂回亂何以
終遙夕明燈且濡翰自我違之子苑藻絕流玩郢斤不
存目流俗恥聖壘塊處空堂中誰為發言梁感慨申微

詞佇立倚長歎

對月有懷

夜氣泛虛爽灘聲來自遲繫舟南斗下翫月西江湄對
酒忽不御茫然空爾思

憶升之

昔卧廬山峽聞君入蠡湖雲帆搖石鏡波影靜天吳去
作南昌客飄然下玉鳬仙人留舊館都督盛新模落筆
揮鸚鵡榮觀四座娛神颺清管發逸興白雲俱我醉聆

猿狄南行愁鵲鵲祇今遙憶處明月隴山孤

題潘進士贈謝昌邑雪山圖

誰謂咫尺勢宛如觀九疑狂風吹白雪片片落天池雲
氣遶半壁煙光昏四維髣髴湘君廟如聞猿狄悲颯沓
凌冬樹點綴有餘姿楚客善毫素游燕人未知北窓遇
陶令大醉雪寒時凍灑丹青筆長歌歸去詞他日看圖
畫難忘剡水思

效庾信作

綺梁文桂刻椒壁石脂漫鏡牀雕孔雀窗箔織青鸞斜
牖銀河轉空庭白露團梨花初浴霧竹影尚低寒不知
紈帳裏誰復夢懷蘭

望齊山有懷

晨行煙莽中路遶山襟沓白雲巖下生青山蓊然合芳
草日離離芳春情若斯吳江千里碧回首寄相思

江上

江色千峯暮雲霞鏡裏光水清沙岸好宛似渡橫塘無

那王孫思蘿蕪處處芳

留別都城諸同志

獻歲芳景滋湛湛江水碧白芷被洲生柔楊蔭廣場美
人蕩春思而我事行役晤賞良已違清尊坐成惜明月
懸予心青山詎能隔

嗟哉我行邁借問窮何方北征自幽薊南往浮荆湘天
地生遠色撫劍何慨慷湯湯大江流思心與之長江竹
鳴鳥暗江春行客傷回颺若有託聆我棹歌章

學謝靈運賦華子岡詩贈趙建昌

朱巒蔚靈輿雲海互盤旋陰霞絢石室夾篠蔽清漣翠
羽紛啁哳瓊蘂合芬妍桂嶺屯蒼靄桃溪迷紫煙朝登
郡樓望佳氣鬱葱芊挹景企嘉客臨風懷羽仙冥賞非
偶愜神理豈虛傳建德寡民務山水發清絃順性奚矯
迹知道在忘筌非君秉淵尚茲理誰為宣

邊貢

贈友

春陽初獻歲芳樹日以青送遠及近郊何由申我情我
情方鬱紆君駕不可停瞻彼飛鴻翼聯翩共遐征奕奕
雲中河爛爛川上星中願渺難遂佇立以屏營

分韻再送文熙

夜久河漢橫春堂別燈黯風淒烏初動露重花猶斂明
發不在茲重關為誰掩

答石峯見懷之作

斗柄當西南河漢東北傾零零露華白晶晶天宇晴微

風度廣陰熠燿時復明卉木日已黃秋氣日已清念子
理素瑟苦調多離聲嗷嗷失侶雁泛泛隨波萍會合固
有期此日難為情

次韻贈李子行之如陳

迢迢阻歡宴戚戚傷離居離居結中懷鬱鬱慘不舒若
人美無度貞抱沖以虛朝為同朝客夕暮隔林墟林墟
積秋霖流潦不可除四野晦蒼蒼行行安所如驅馬臨
大道瞻顧空踟躕

康海

雜興

許西亦佳勝日日有襟期
田園俯川陸葵藿滿堦墀
野叟遺濁醪嘉樹過涼颼
微曛上崇巘遐眺引東菑
牧笛風外來園禽鳴別枝
睡足發新懷此心誰得知

於近山尚書莊上作

春風纈芳林虛堂翳脩竹
苟愜靜者心寧慙世人目
昔予懷此遊悠悠幾更宿
豈期聯輿來沉醉卧茲曲
高歌

歎往蹤遐眺覽前躅主人古司徒雅興薄裴陸但能永
今夕何憂乏醺醪

閒居詠懷

窮居無別悰掃徑揖清靄濁醪自斟酌幽花復芬馥雖
微恣性歡亦鮮迷津慨寒蟲相續鳴潦水參互沛節物
漸以更人事紛相代猗彼巢由徒曠音昭物外

同用昭自華南郭往西谿作

愛爾草堂靜驅車同討尋南郊更崎嶇春溪多綠陰蒲

杏漸將徧松竹已成林感慨宿昔意相對靜塵心悠悠
日西邁渚禽揚妙音即此興已極何必東山岑

洪川柳浦斜眺

煙墟翼層壑巖陰生暝色柳際斜陽來徘徊望安極披
襟挹清風寒木值嘉息坐久山月升情景具相得稽康
非養生謝安有高識歌嘯振空林歸驂苦追逼眷言期
重來何必雲間翼

觀禾

我來彭麓下坐愛青山色雨過忽新涼蒼煙望無極秋
禾行欲成豈畏驕陽逼隴畝綠如屯原隰少螟螣同欣
有年樂詎知天子力

王九思

彭麓山房宴集

客有紅珊瑚盈盈高數尺持之博村酤反為農夫搯相
逢不一醉別後怨疇昔我今有美酒來坐松下石勸君
君不飲騎馬將安適不見桃李花落盡五侯宅

對酒憶康五

林棲鮮儔侶芳醕聊獨親繁音媚晴景嘉賓及茲辰習
習谷風發萋萋卉木春黃鳥鳴枝間翩翩求其羣對此
豈不樂念彼同心人室遠心徒勞追趨靡所因安得驂
雲霓頃刻馳見君

燕會贈諸友

卜日駕言邁睠茲川陸平親友集高會置酒青園亭中
庖具膳羞歌舞羅衆伶鼓瑟發清響擊筑揚新聲興移

夏日短入夜燈燭明壯士起為壽誼重白璧輕人生固
有懷冠組非所縈願言崇令德勿渝金石盟

對菊有懷諸友

東籬零露滋秋色燦盈目仙姿有殊類密葉映深綠時
維霖潦收欣看秫釀熟引觴聊自酌玩此羣芳馥白雲
何英英南山亦蟲蟲微風吹我衿飄飄絕煩煬杖藜行
且誼清商發新曲仰視歸雁翔翩翩亦何速慨我平生
親佳人在空谷逸氣蛟龍騰貞懷鸞鳳伏川原邈相隔

鵲聲不可屬徘徊日空暮歎息倚修竹

罨翠樓聽歌

憑空覽蒼翠登茲百尺樓春風蕩擊筑高歌發秦謳梁
間轉流麗雲際迴歌喉陽春寡酬和佳人不可求恍疑
碧桃樹景與瑤池侔曲終意未極青楓生遠愁

王廷相

九日安陵同蔡成之發舟

亢帆安陵浦泛舸清川潯渚枉倦迴沿厓傾詫崎嶽寒

原變淒候浮靄散層陰落日隱叢薄孤霞冒平林雖同
佳人娛屢興遊子吟曠達獲自古維繫慚在今緬懷籬
下菊結念丘中琴川塗渺無緒風波浩難任

明月沱

客行無次序向夕舟復維豈不厭水宿搖裔渺前期沱
明星月上江冷蛟龍移野鼓何填填宵火亦離離牛渚
暮猿吟湘潭傷楚辭我行方浩然我懷亦遠而流浪自
古昔慨歎及今茲驚鵲靡定所荒雞詎知時行藏隨去

住明發良不遲

夏日懷故園親友

齋居日冲靜不覺時令侵鳴鳥已驚聒喬木森夏陰披
襟承緒風沉拂龍唇琴故人本同調幽事阻相尋飛鴻
勞錦札素夢迷遥岑世氛苦未謝悵望空遠心

時雨

濕雲晨出山冥雨夕不渴流膏潤郊野隨春佐生發葱
蒼變上林清瑩淨北闕稼植奄長畝國計諒靡缺已舒

官長懷豈茲農父悅

遊西山

偶從西山遊浮靄滿幽谷
臨春水木茂度岸沙澳曲中
有玉華僊閒將素書讀我欲
從此休冥心附幽獨

朱應登

擬陸機招隱

修塗苦躑躅曲澗聊盤桓
盤桓將安之所樂在淵泉清
冷足朝盥幽眇窮夕觀
雲構蔽層木翠幄引芳蘭
玉鯉

胃輕畧銀縷落素盤忽枉良朋儔誠款慰夙歡富貴豈
不欲時命非可干稅駕從所適茲焉以永歎

野中作

細細朝雨零纖纖麥苗長丁夫荷鋤出所至成偃仰林
喧羣意動山空百泉響佳境偶獨逢無人共幽賞

贈別黃子和

舉世昧所欽見客隨諧嬉良朋久寂寥十載惟君知把
袂執素手懽悰不自持人事忽生變與君長別離膏車

歧路側欲發更遲疑虛名夏厨蠅短景朝華枝兩心各
相許脈脈無一詞濁泥媿清塵何以備驅馳盟言願有
終白首以為期

贈劉元瑞守紹興

朝出承明廬駕言還故鄉當門結旌旆觀者倍生光故
人欣再見眷眷意難忘舉觴承湛露頌德詠羔羊周官
十二牧職貢各殊疆持子夙夜心坐致黎庶康深衷豈
念此但感別日長相彼水中鳬羽翼同翔翔風波一失

所望望徒心傷

夢大復何子

京華一云別瞥若紛飛翼遙遙南中道念子無消息歲
徂寒暑變日落風雨黑詎知萬里魂能達君子側篇章
煩見示觸目見古色瀏瀏清瀨鳴擢擢朱絃直指摘發
雋語要我以終極大質多渾成至寶去雕飾晤語忽復
竟驚起謝良德音徽猶若聞轉盼已難即悵悵牽垂帷
仰睇梁月色何由託歸鴻附此長相憶

酬方思道以詩帙見寄

方子還山中兩度寄詩帙憐予方在疚報答百不一故人枉相存所恨越阡術江南十月交山中稼應畢天寒脆榆柳霜重熟棗栗理甕得舊醅攀厓割新蜜既可歡親顏亦堪悅家室吾翁嗟已晚念此重有失尚幸老母康廕以慰蓬華人生歸有道貧賤匪所恤作詩謝同懷商風振瑤瑟

顧璘

東郊田園四首

并序

錄三首

璘本江東腐儒無廟廊之骨從宦三十年獲落不
就謝歸秉耒遂與野人相親養雞牧豕能任蓑笠
擊缶醉歌禮法俱廢或肅容對客如孫狙御衣冠
隨即褫去聞談官政如爰居聽鐘鼓目掉心眩乃
知情質煙霞不可以強變也新營田園輒賦此篇
陶公歸桑里謝客營石門於世既無競努力事田園春
還理荒穢良苗應時繁豈不念歲豐天道難預論列槿

藩草屋藝蔬備晨飧
郊居漸成趣益厭城市喧
菽水苟無闕萬事奚足言

出門見青山幽意日瀟洒
修竹繞舍東流水在田下衣
冠不須著犁鋤亦時把日與
山翁游禮貌樂疎野風俗
重時令相邀作鄉社濁醪滿
浮蟻蛙魚剖新鮮交酬各
酩酊至樂絕無假長笑宇宙
間誰是忘形者

刈麥思時暘分苗望時雨
彼蒼於農人遷就亦良苦好
雨從東來原田白腴腴老
稚荷蓑出綠縵紛可觀引耜

驤且鳴餘懼及家拈連歲荒負租頗遭官長怒今幸占
有年且願給公賦絮酒兼炙雞殷勤祝貓虎

碧溪

落落高梧陰俯瞰寒流碧微雲過疎雨秋容淡無迹魚
遊綠藻晴鳥下青蕪夕興至每垂綸歌罷還岸憤漁父
兩三人時來共爭席

贈孫思和

東林一片石綠蘚生秋痕時招葛巾客對坐傾匏尊俯

愛澗下水仰觀枝上猿誰能策羸馬日夕依朱門

東鄭生

圖史聊足娛胡為苦多營經旬謝賓客春草當門生白
髮午未櫛青山時獨行蕭蕭樹上飄莫與風俱鳴

薔薇洞

百丈薔薇枝繚繞成洞房密葉翠帷重穠花紅錦張對
著玉局棋遺此朱夏長香雲落衣袂一月留餘芳

柏屏

壁立青玉屏下見古柏根相憐歲寒葉鬱作蒼雲屯貞
姿洗霜雪老氣橫乾坤名園非此種誰可當君門

蕉石亭

怪石如筆格上植蕉葉青蒼然太古色得爾增娉婷欲
携一斗墨葉底書黃庭拂拭坐盤薄風雨秋冥冥

度楓木嶺

初謂山拂天飛鳥不可度逡巡躡危磴乃即我行路百
折頻攀援十步九回顧高林忽在下衣襟有雲霧倒景

猶照人平地黯將暮方當日月過似可捉烏兔飛瀑如
天河所少鵲成渡東北望故鄉江流莽傾注長風動萬
里獨立難久佇

題龍巖額有賦

蒼厓積鐵古中空若天開不知寒泉水潺湲自何來石
田莽重疊上有仙人臺淋漓濕元氣玉黍長蓓蕾青春
始來游桃花映樽壘主人邀痛飲酣歌日西頽獨揮菁
茅帚書破巖上苔巨靈拍掌笑大劫俱揚灰吾意在山

水短長安計哉

南巖雷神祠

雷神棲何所巖洞深杳冥幽林蔽日影寒澗餘龍腥經
年尚留雪當午仍見星石奇出變相境勝通神靈譎怪
山海事流傳信前經


辨蛤和涇川公

漁海窮瀹汭獵山厯嶺岬生人胡多勞養此六六牙聖
哲著禮經細不遺螳蛙食龜一染指因以傾厥家末俗

貴珍異載籍紛喧譁美哉爾石蛤奚免網與叉修脰雪
長苻腴中剖團瓜烹以實下豆亦慰賓筵嘉南荒盛蟲
族大者蛇與蟄瑣細及百種射影兼含沙食者苦嘔泄
傷者困瘡痂例舉混美惡頗笑昌黎差幸蒙七箸賞重
以褒辭加河豚自此賤況復論魚鰕



御選明詩卷二十四



總校官庶吉士臣侍朝
校對官檢討臣蕭九成
謄錄監生臣傅瓌芳